



Félagstofnun
Stúdentanna

Starfsáætlun Leikgarðs

Skólaárið 2012-2013

Umsögn foreldraráðs

Fyrir skólaárið 2012 - 2013

Inngangur

Samkvæmt lögum um leikskóla nr. 90/2008 vinna leikskólar eftir Aðalnámskrá fyrir leikskóla. Samkvæmt henni vinnur hver og einn leikskóli upp sína skólanámskrá þar sem fram kemur á hvern hátt leikskólinn uppfyllir þau viðmið sem þar eru sett fram. Skólanámskráin á að vera aðgengileg á heimasíðu leikskólans.

Starfsáætlun leikskóla

Leikskólasvið Reykjavíkurborgar hefur þá stefnu að ár hvert skulu leikskólar borgarinnar og sjálfstætt starfandi leikskólar sem njóta styrkja frá Reykjavíkurborg skila starfsáætlun fyrir komandi leikskólaár, eins og kveðið er á um í lögum um leikskóla nr. 90/2008. Þar er jafnframt kveðið á um að starfsáætlun skuli lögð fyrir foreldraráð leikskólans til umsagnar.

Tilgangur starfsáætlunar er að gera skólaþróun leikskólans markvissa með árangursmiðuðum markmiðum og umbótamiðuðu innra mati. Hún á að sýna starfsfólki, foreldrum og rekstraraðilum hvernig starf leikskólans gekk á síðasta leikskólaári og hvernig unnið verði að umbótum og nýjum verkefnum á því næsta.

Starfsáætlun leikskólans tekur gildi 1. september ár hvert og skal skilað rafrænt til Leikskólasviðs fyrir 1. júlí. Starfsáætlanir eru lagðar fyrir Leikskólaráð til samþykktar.

Í starfsáætlun leikskólans skulu koma fram:

- Matsaðferðir leikskólans og umbótamiðuð áætlun sem unnin er út frá niðurstöðum innra og ytra mats.
- Áherslur í leikskólastarfinu sem ætlunin er að vinna að, markmið, leiðir að markmiðunum áætlun um hvernig þau verða metin.
- Áherslur í starfsáætlun Leikskólasviðs sem leikskólinn vinnur að.
- Starfþróunaráætlun leikskólans og upplýsingar um starfsmannamál.
- Fjöldi barna, kynjahlutfall, dvalarstundir, fjöldi barna sem njóta sérkennslu og fjöldi barna af erlendum uppruna.
- Upplýsingar um foreldraráð, foreldrafundi og foreldraviðtöl.
- Skóladagatal fyrir árið.

Mat á leikskólastarfi

Tilgangur innra mats er að leggja faglegan grundvöll að endurbótum í leikskólastarfi og vinna kerfisbundið að því að auka gæði þess og gera það skilvirkara.

Markmið innra mats samkvæmt lögum um leikskóla er að:

- Veita upplýsingar um skólastarf, árangur þess og þróun til fræðsluyfirvalda, starfsfólks leikskóla, viðtökuskóla og foreldra.
- Tryggja að starfsemi leikskóla sé í samræmi við ákvæði laga, reglugerða og aðalnámskrár leikskóla.
- Auka gæði náms og leikskólastarfs og stuðla að umbótum.
- Tryggja að réttindi barna séu virt og að þau fái þá þjónustu sem þau eiga rétt á samkvæmt lögum.

Skólanámskrá leikskólans er skrifleg lýsing á því sem gert er í leikskólanum og á því sem á að gera. Þar koma fram bæði markmið og leiðir leikskólans. Skólanámskrá leikskólans setur því viðmið fyrir matið.

Tilgangur ytra mats er að safna upplýsingum um viðhorf foreldra leikskólabarna og starfsmanna til að nota við innra mat leikskólans. Að auki er það liður í ytra mati Leikskólasviðs og/eða Menntamálaráðuneytis.

Hlutverk foreldraráðs

Samkvæmt 11.gr. laga um leikskóla frá 2008 er hlutverk foreldraráðs að gefa umsagnir til leikskóla og nefndar, sbr. 2. mgr. 4. gr., um skólanámskrá og aðrar áætlanir sem varða starfsemi leikskólans. Þá skal ráðið fylgjast með framkvæmd skólanámskrár og annarra áætlana innan leikskólans og kynningu þeirra fyrir foreldrum. Foreldraráð hefur umsagnarrétt um allar meiri háttar breytingar á leikskólastarfi.

Umsögn foreldraráðs:

Þegar á heildina er litið er Foreldraráð leikskólans Leikgarðs ánægt með starfsáætlun skólans fyrir veturinn 2012-2013. Það er gott að sjá að vel virðist vera staðið að innra mati leikskólans og fögnum við því að hlutlægar aðferðir séu og hafi verið notaðar í mati á starfi og umhverfi skólans. Jafnframt er gott að sjá að matinu er fylgt eftir og viðeigandi ráðstafanir hafa verið gerðar, það er lagfæringar inn á deildum og annað slíkt. Þá telur foreldraráð afar brýnt að ytra mat á starfi Leikgarðs verði framkvæmt þar sem að slíkt mat fór ekki fram á síðastliðnu ári.

Verkefnaáætlun Leikgarðs byggir á því starfi sem unnið er á leikskólanum og þeirri hugmyndafræði sem leikskólinn starfar eftir. Verkefnaáætlunin er skýr, skipulögð og metnaðarfull. Foreldraráð telur það mjög mikilvægt að henni sér vel fylgt eftir og þá ekki síst verkefnum eins og innra mati, framkvæmd og vinnslu nýrrar móttökuáætlunar, framkvæmd iðjuskráningar (sem er nýtt verkefni innan leikskólans) og ekki síst vinnslu nýrrar skólanámskrár.

Það er afar gleðilegt hversu vel virðist staðið að starfsmannamálum og margir fagmenntaðir starfsmenn starfa á Leikgarði. Starfsmenn fá starfsþróunarsamtöl árlega þar sem þeir hafa möguleika á því að koma sjónarmiðum sínum á framfæri. Þá er greinilegur metnaður fyrir endur og símenntun starfsmanna innan leikskólans. Þessir þættir sem og metnaður stjórnenda til þess að viðhalda góðum starfsanda skilar sér í bættu starfi og ánægðari starfsmönnum. Ánægja og góð líðan starfsmanna á vinnustað skiptir miklu máli þar sem við vitum að það skilar sér til barnanna okkar í daglegu starfi.

Foreldraráð Leikgarðs 2012-2013

Hulda Rós Bjarnadóttir
Kristjana Pálsdóttir
Selma Ósk Höskuldsdóttir
Lísabet Ósk Jónsdóttir
Ingólfur Már Ingólfsson
Elísabet Jónsdóttir
Sunna Kristín Gunnlaugsdóttir
María Guðnadóttir

